



Datë: 05.02.2026
Numër Protokolli: 662/2026

A.nr.64/2026

Këshilli i Pavarur Mbiqëqyrës për Shërbimin Civil të Kosovës—Kolegji për Shqyrtimin dhe Vendosjen e Ankesave, në përbërje nga: Ardita Haxhnikaj Demi, kryetare, Malsore Gashi Bajraktari dhe Eshref Shabani, anëtarë, me Merlinda Ramaj, në cilësinë e procesmbajtëses, në procedurë sipas ankesës me numër A.nr.64/2026, të datës 22.01.2026, të parashtruar nga ankuesi R.Sh, kundër organit të punësimit: Komunës së Vitisë, në çështjen juridike “*kërkesë nga marrëdhënia e punës*”, duke vepruar në pajtim me nenin 6, paragrafin 1, nën paragrafin 1.1 dhe nenin 18, paragrafin 1, nën paragrafin 1.2 dhe 1.4 të Ligjit Nr.06/L-048 për Këshillin e Pavarur Mbiqëqyrës për Shërbimin Civil të Kosovës, si dhe në mbështetje të Rregullores Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbiqëqyrës për Shërbimin Civil të Kosovës, me datë 05.02.2026, mori këtë:

V E N D I M

I. Aprovohet si e bazuar ankesa me numër A.nr.64/2026, e datës 22.01.2026 e parashtruar nga ankuesi R.Sh, ashtu që, **detyrohet** Zyra e Personelit e komunës së Vitisë, që brenda afatit prej pesëmbëdhjetë (15) ditësh nga dita e pranimit të këtij vendimi, të bëjë shqyrtimin e kërkesës së ankuesit të datës 25.11.2025 dhe të nxjerr aktin administrativ në pajtim me legjislacionin në fuqi.

II. Këshilli i Pavarur Mbiqëqyrës për Shërbimin Civil të Kosovës, duhet të njoftohet me shkrim pas ndërmarrjes së veprimeve në pajtim me këtë vendim.

A r s y e t i m

Nëpunësi civil, R.Sh (në tekstin e mëtejme referuar: Ankuesi), me datë 22.01.2026, parashtruar ankesë në Këshillin e Pavarur Mbiqëqyrës për Shërbimin Civil të Kosovës, kundër Komunës së Vitisë/ Zyrës së Personelit të Komunës së Vitisë, për kategorizimin e pagës në specialist, kthimin e mjeteve në mënyrë retroaktive nga hyrja në fuqi të ligjit të pagave në fuqi.

Këshilli i Pavarur Mbiqëqyrës për Shërbimin Civil të Kosovës (tutje referuar Kolegji i Këshillit) bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave, me datë 23.01.2026, ka proceduar kërkesën për përgjigje në ankesë në komunën e Vitisë, ndërsa, kjo e fundit, më datë 04.02.2026 ka dërguar përgjigjen në ankesë.

Kolegji për Shqyrtimin dhe Vendosjen e Ankesave (në tekstin e mëtejme referuar: Kolegji i Këshillit) për vendosje meritore administroi këto prova: Ankesën me numër te protokollit 344/2026 të datës 22.01.2026 e parashtruar nga ankuesi në Këshillin e Pavarur Mbikëqyrës për Shërbimin Civil të Kosovës; Ankesën për koeficientin e pagës e datës 25.11.2025; Vendimi me numër te protokollit 7259/2025; Vërtetimet për marrëdhënie të punës; Ankesën për koeficientin e pagës e datës 12.09.2023; Ankesën për koeficientin e pagës e datës 07.10.2024; Përgjigjen ne ankesë me numër A.nr.344/2026; Akt emërimit e datës 30.12.2011 të ankuesit.

Nga administrimi i shkresave të lëndës rrjedhë se ankuesi është i punësuar në Komunën e Vitisë dhe së i njëjti sipas Akt Emërimit me Nr.06-112/2485 të datës 30.12.2011, mbanë pozitën *Zyrtar për projekte*, në Departamentin e Financave.

Ankuesi më datë 25.11.2025 i është drejtuar Zyrës së Personelit të Komunës së Vitisë, me kërkesë për rregullimin e koeficientin e pagës konkretisht që pozita e tij të klasifikohet si specialist inxhinier i ndërtimit, ndërsa, sipas shkresave të lëndës dhe pretendimeve në ankesë organi i punësimit nuk ka dhënë përgjigje në kërkesën e ankuesit të datës 25.11.2025.

Ankuesi ka parashtruar ankesë në Këshillin e Pavarur Mbikëqyrës për Shërbimin Civil të Kosovës, me pretendimin ankimor se të njëjtit nuk i është kthyer përgjigje nga institucioni ku punon lidhur me kërkesën për rregullim të koeficientit përkatësisht klasifikim të pozitës si specialist.

Kolegji i Këshillit ndërlidhur me rregullat e veprimeve procedurale të një organi publik, ju referua dispozitave të Ligjit Nr.05/L-031 për Procedurën e Përgjithshme Administrative (tutje referuar: LPPA), përkatësisht nenit 10 paragrafi 2 ku përcaktohet se: *2. Organi publik zhvillon procedurën administrative sa me të shpejtë dhe me sa më pak shpenzime, për të dhe për palën, duke mos cenuar çfarë është e nevojshme për një rezultat të ligjshëm e të përshtatshëm të procedurës administrative*, nenit 98 paragrafi 1 dhe 2 ku përcaktohet se: *1. Procedura administrative nisur sipas kërkesës, do të përfundojë sa më shpejt që të jetë e mundur, por jo më vonë se sa afati i përcaktuar me ligj të veçantë për atë lloj procedure. 2. Në rast se ligji i veçantë nuk ka paraparë një afat, siç është paraparë në paragrafin 1 të këtij neni, afati i përgjithshëm i zbatueshëm për përfundimin e procedurës administrative është dyzetepesë (45) ditë nga fillimi i saj, si dhe nenit 97 paragrafi 1 të këtij ligji, ku përcaktohet se: 1. Një procedurë administrative e nisur sipas kërkesës, përfundon me njoftimin e një akti administrativ apo lidhjen e një kontrate administrative, dhe si rrjedhojë në kuptim të këtyre dispozitave ligjore si dhe bazuar në shqyrtimin e provave materiale të çështjes, dhe si rrjedhojë në kuptim të këtyre dispozitave ligjore si dhe bazuar në shqyrtimin e provave materiale të çështjes, Kolegji i Këshillit konstatoi se organi përkatës i punësimit, në rrethanat e rastit konkret, nuk ka vepruar në pajtueshmëri me dispozitat përkatëse ligjore, në raport me kërkesën e datës 25.11.2025 të parashtruar nga ankuesi, ngase sipas bazës ligjore si me sipër, vullneti i organit publik në realizimin e autoritetit publik formësohet në procedurë administrative dhe manifestohet në formën e njërit prej veprimeve administrative, siç janë: akti administrativ; kontrata administrative apo akti real, dhe se në vlerësimin e Kolegjit, organi përkatës i punësimit, në kuadër të autorizimeve të përcaktuara me legjislacionin në fuqi, është dashur që të nxjerr akt administrativ në kuptim të vendosjes dhe të njoftoj palën për aktin e tillë, brenda një afati prej 45 ditësh sikurse përcaktohet me nenin 98 paragrafi 2 apo afatit të vazhduar sipas nenit 99 paragrafi 1 të LPPA-së.*

Kështu që, thënë si më sipër e duke u bazuar në nenin 18, paragrafin 1, nën paragrafin 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji i Këshillit vendosi të aprovoj si të bazuar në kuptim të shkeljeve procedurale dhe si rrjedhojë detyroj Njësinë e Burimeve Njerëzore të Komunës së Vitisë, që në respektim të dispozitave procedurale të shqyrtoj kërkesën e ankuesit të datës 25.11.2025 dhe të nxjerr akt administrativ në përputhshmëri me dispozitat ligjore në fuqi.

KËSHILLË JURIDIKE: Ky vendimi hyn në fuqi ditën e nënshkrimit nga Kryetarja e Kolegjit. Pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë/Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS

Lënda:A.nr.64/2026

Merlinda RAMAJ

Procesmbajtëse

Ardita Haxhnikaj DEMI

Kryetare e Kolegjit

Vendimi i dorëzohet:

- Ankuesit R.Sh;
- Udhëheqësit të Zyrës së Personelit të Komunës së Vitisë;
- Arkivit të KPMSHCK-së;